

محمد رجب

همس الحروف

أشعار بالعامية المصرية

الطبعة الأولى 2018

بطاقة الكتاب

عنوان المؤلف : همس الحروف
المؤلف : محمد رجب
التصنيف : أشعار بالعامية المصرية
رقم الإيداع : 2018-13788
التقييم الدولي : 978-977-6656-39-0
عدد الصفحات : 100 صفحة
رقم الإصدار الداخلي : 172
تصميم الغلاف : الشاعر محمد الساعى

جميع حقوق الطبع والنشر محفوظة للشاعر، ولا يحق لأى دار نشر طبع ونشر وتوزيع الكتاب الا بموافقة كتابية وموثقة من الشاعر

دار النيل والفرات للنشر والتوزيع

ثورة مصرية تشرق إبداعا على الوطن العربي

رئيس مجلس الإدارة

ناجى عبد المنعم



رخصة مزاولة مهنة: 58365 - سجل تجاري: - 13242 / 2017 - بطاقة ضريبية: 35-01-572

عضو عامل باتحاد الناشرين المصريين رقم 941 لسنة 2018

هاتف: 01011256943 - 01116202218 - 01202541192 تليفاكس: 020554372901

alnilwaalfourat@gmail.com

المقر الرئيسي: ج.م.ع. محافظة الشرقية - العاشر من رمضان - مجاورة 13 - امام سنترال 13 - فكار 304

كلمة شكر و عرفان بالجميل

إلى كل من ساهم في بناء وإصدار هذا الديوان
سواء كان قريباً أو بعيداً
- جزاكم الله عني خير الجزاء -

الإهداء

إلى توعم روحى وهمس حروفى
وبسمة عمرى من وهبتنى السعادة
والحب والحياة
الباقية حتى التقيها فى جنة الخلد
(ان شاء الله)
الراحلة
زوجتى
سميرة أحمد
(همس الحروف)

إلى أمى ، أبى ، أسرتى ،
، اصدقائى ، أساتذتى ،

محمد رجب

حلو الشمايل

إوعى اشوف الدمع تانى
فوق خدود القلب ساييل
ياللي ورد خدودك انتِ
فتح النور في الخمايل
لما دمع عينيكي ينزل
يشتكى القلب اللي مايل
والطيور يسكت غناها
والنجوم تعمل عمائل
أما لما الضحكه تشرق
قلبي يتقطع نسايل
والنسيم يضحك في صبحه
والربيع حلو الشمايل

أنا المصري

أنا بيكي

أنا تايه في حواركي

أنا بسمه على وشك

أنا نسمه تواسيكي

أنا ترانيم في إنجيلك

أنا آيه بترقيكي

أنا دمي فدا صوتك

وسال الدم يفديكي

أنا تاير ما يرضى الظلم

بروحي وقلبي أحميكي

ولا رصاص الطغاه يقدر

يخوفني ويؤذيكي
ولا سجان بزنازينه
هاحبس حلمي انا ليكي
أنا عاشق لحيه
تناديني ... تناديكي
تدوس الظلم أقدامي
ونصر المولى يرضيكي
يا غاليه إنت مش وحدك
أنا جنبك وحواليكي

ألم تاني

ما بين العتمه والعتمه ألم تاني
وميت آهه وميت دمعه محوطاني
لا أنا شايف طريق بكره
ولا أحزاني سايباني
ما بين الدمعه والدمعه بكا مكتوم
وصرخه ف قلبي محبوسه كساها غيوم
ولا عمري شكيت حظي وانا المظلوم
لكن مكتوب على جيبني
أعيش محروم لا أنا عايش .. ولا ميّت
وأحزاني بقت ليّا قدر محتوم

أمل واحد

صباح يسعد ويتبسّم
صباح بالعطر يتنسّم
وضحكه بالأمل ترسم
أمل فرحان لأولادي
وبكره جديد لبلادي
وحلم جميل يجمّعنا
وليل حالك يودّعنا
يهل نهار ضياه دايم
يفطّرني وأنا صايم
يبشّرني بنسايم عيد
يفرّحني بلبس جديد
يغني معانا أحلى نشيد

وكل قلوبنا بتغني
وتهرب دمعتي مني
يدوب القلب في أيديكم
وأخذ من قلبي واديكم
ماهو قلوبنا بقت واحد
وجمعنا إله واحد
وطن واحد .. أمل واحد

أنا منها

أنا مخلوق من طينها
تعذبني ف رغيف عيشي
لكن روحي في أحضانها
ياما ضمتني حواريتها
وأنا واخواتي عاشقينها
وروحي تتسحب مني
لما أكون بعيد عنها
تجافيني .. تبكينني
وعارف اني نور عينها
وغضب عنها تشقيني
وتشقيني دموع عينها

دي مصر يا ناس
ومين غيرها !!
وكل ولادها عارفينها

عاشق ترابك

مهما تطول الليالي
لا بد ييجي نهار
تطلع شمس الأمل
ويفتّح النّوار
تروي دماء الشهيد
تزرع لنا أزهار
أزهار نسيم الأمل
تتهدّم الأسوار
أسوار ظلام الطغاه
هدّتها أيد ثوّار
ثوّار في بركان غضبهم

فَجَرّوا أَنهار
بحلف يا بلدي ...
بقرآنك وأناجيلك
حافر في قلبي ..
حروف إسمك وقناديلك
واصلني فجري وقداسي وأدعي لك
إحنا ولادك
بيجري في دمننا نيلك

طفل شهيد

لكل طفل مات شهيد

أو مات غريب

أو مات بعيد

الطفل ده مات من زمن

زمن انكتب فيه الميلاد

على شهادة وفاه

ومفیش نجاه

والكل محبوس في الهموم

وسمانا مليانه بغيوم

ومافیش مطر

والكل قاعد ينتظر

ساعة الخطر
ساعة ما سيف الظلم
يحصد بسمته
والقبر يدفن فيه
حكايته وسكّته
وإن يوم هينطق...
باللي كاتمه من زمان ...
سكينة الظالم في لحظة...
تسكّته

صباحك ورد

صباحك ورد بيفتّح
صباح بيقول لي قوم افرح
وبيغني بصوت كروان
وبيقبّل جبين عرقان
ويرسم بسمه للشقيان
ويزرع بكره للغلبان
يجيب الفجر من تاني
تنوّر أرض أوطاني
ويطرح زرعها نوار
يفتّح في الوشوش أزهار

وتغلى ضحكتي في الدار

وعلى مرّ التاريخ يا امه

نعيش أحرار ..

نموت أحرار

حياة سليمان

حياه مليانه بالإيمان
ونفحه من رضا الرحمن
حياة سليمان
كانت دعوه واحد غلبان
وضحكايه فقير شقيان
حياة سليمان
دي غنوايه حزين تعبان
وبتطبطبّ على جيني
وتمسحلي دموع عيني
تفرّحني وانا زعلان
حياة سليمان كانت أمي

كانت بتصلِّي وتسمِّي
تزيح عن دنيتي همِّي
وتدعيلي في كل آدان
(حياة سليمان)

الصبر خداع

نشّف حزنك بدموعك

واكتم همّك في ضلوعك

وانده ع الصبر تلاقي

الصبر خلص ف خضوعك

أنده على قد الحزن اللي ماليني

على قد خطاوي اليأس ما ترميني

على قد ليالي النوم مابتهجرني

على قد ما همي يغطيني

إنده ع الصبر تلاقي الصبر خداع ...

وكلام لَوَاع

هتلاقي الصبر هموم

وطريق مرسوم بسموم

وخرابة معشش فيها البوم

أنده والنوم مخاصمني

وساعات الأيام تهزمني

ورنين دقائقها بيألمني

ويقولي الصبر ظلام الاعمى

عجز العاجز ..

حجّة مهزوم

بيجر الضعف وراه

أصبر واتلذذ بعذابك

ده الصبر بدايتك وحكايتك

واللحد اللي بيطوي نهايتك

زلزليني

زلزليني ...

وارسمي...

صورة شفائك فوق جبيني

ياللي قبل ما نلتقي

أنا كنت سامعك بتناديني

وارسمي قلبي اللي حبك

جوة قلبك وارسميني

واغربي بسمة تنور

جوة عمري وتواسيني

أحضني بعينك عيوني

ياللي صورتك ننّ عيني

ودعي أيام خانتنا و زعلتنا
بس أوعي تودعيني
ياللي قلبي يوم ما حبك
عدّ أيامي وسنيني
مهما يبعد عني رسمك
شوقي ويّاكي وحنيني
حُبك إنتِ جوّه روحي
مالي أيامي وماليني

قلب متعشّم

ولسّه الروح بتتنسم
نسايم فرح حنّاله
ولسّة بكرة جاي يرسم
في عزّ الضلّمة آماله
ولسّة الدمع في عيوني
ينام وفي حضنه أشجانه
لكن بكرة اللي جايّ موجوع
يلاقي همه في مكانه
لا قادرة عيوني تتبسّم
ولا نهاري قادر يرسم
ولا في الفرّح متعشّم

يَطِيبُ عَمْرِي وَيَهْنَأُهُ
وَلَا رَبِيعِي هِيْصُنْدُفُ يَوْمِ
وَيِيْجِي مَرَهُ فِي أَوَانِهِ

طلّة قمر

طلّيت من الشباك

الله عليك محلاك

نور قمرنا الكون

لما ألتقى بضياك

وسط الزهور بتكون

زهرة تراعيها عيون

رموشه زابنه القمر

الروح فداه بتهون

طلّيت في ليل ونّاس

تفتن عيون الناس

بدر التمام إكتمل

زاده جمال إحساس

طلّيت في عزّ نهار

عطرك عبير أزهار

ما تقوّلني أيه العمل

لما العقول تحتار

قول يا قلم

قول يا قلم بكره هاتكتب إسم مين

أقفل كتاب الذكريات

وامسح دموعي المجروحين

ولا استعد من سكات

واصبرّ الدمع الحزين

أقفل خلاص باب الفراق

ولا اسيب كل البيبان متفتّحين

غشّشني مين ..

من الأسامي هيختفي

علشان خدودي ..

من الدموع بقوا غرقانين

قول يا قلم بكره هاتكتب اسم مين
كل اللي عشناه في الحياه يصبح عدم
والبسمه ليه على الوشوش تصبح ندم
حتى الأمانى فى اللقا
واحد ... واحد بتتهدم
ليه تختفى !!
والبسمه كانت جوّه عينها بتترسم
والآه لما بنلتقى
على طول بتتحول نغم
بعد الرحيل ...
الذكريات الحلوة كفتها الألم
ونعيش بقى مستنظرين
ساعة اللقا .. ساعة الفراق
ساعة الرحيل .. ساعة العدم

آه يا وطن

كل سنه وأنتَ بسلامه يا وطن

الكل باعك

كل سنه وأنتَ في قلوبنا بألف خير

مانناش صلّه باللي اتمحّى ...

من قلبهم معنى الضمير

ولا لينا دعوة باللي خان

ولا بعد ما مثلّ علينا ظهر وبان

كل سنة وأنتَ بسلامة يا وطن

مهما يحاولوا يهدموك

إيدين ولادك بنايين

مهما يحاولوا يهزموك
بإيماناً دائماً منصورين

كل سنه وأنتَ بسلامه يا وطن

مليان جراح

فيك الأمل ..

سافر وراح

ومهما طال الليل أكيد

جاي الصباح ..

جاي الصباح

حروف الشقا

ما بين حروف الشقا

جاتلي حروف الجر

وبين أمل في اللقا

وبين آهات المرّ

أشْبُكْ خيوط سكتي

ما اعرف مطر ولا حرّ

واغرق ما بين دنيّتي

بين الأمل والشر

يقهرني ظلم البشر

والعين دموعها تصرّ

وازرع قسايا أمل
ورق الحياة يخضّر
واشرب دموعي مطر
يروى العطش ما يضُر

كريم يارب

لقيت النار بتحرقتي

وعُصَياني ببسبقتي

وقرآني بيلحقتي

رجعت يارب صدقتي

وأنا نادم وندمي عظيم

كريم يارب .. سبحانك .. يارب كريم

يارب فتحت لي بابك

رميت ذنبي على اعتابك

وكان حلمك بأحبابك يارب عظيم

كريم يارب .. سبحانك .. يارب كريم

يارب التّوبه والغفران
وعبدك بالذنوب ملّيان
وسبقاني دموع عيني
يارب في رحمتك طمعان
كريم يارب .. سبحانك .. يارب كريم

قرّيت يارب قرءاني
وزاد في القلب إيماني
لقّيت قلبي ووجداني
يبكي ع اللّٰي فات ندمان
كريم يارب .. سبحانك .. يارب كريم

أنا شامم ريح الجنّه
وكلي أمل وبتمنّي

تزین دنیٲتی السنّہ

وفی الآخرة یزیّنی

هدی وغفران

کریم یارب .. سبحانک .. یارب کریم

همس الحروف

لَسَّهْ هَمْسِكِ
سامعه قلبي بيناديني
لَسَّهْ صورتك
بسمه صافيه بتواسيني
حتى لما العين تفتّح
بالتقيكي ننّ عيني
لسة لمسة أيدك أنتِ
حاضنه أيامي وسنيني
عارف انك راجعة تاني
من الغياب مش هتسيبيني
من الجراح اللي كواها ..

طول غيابك هتداويني
والأمل اللي فارقتي
لما غيبتي
راح يجيني
بس أترجّاعي لو ..
هطوّلي عندك خديني
تلتقي روعي بروحك
وألقى حضنك بيراضييني

أغلى إسم

يا شروق الشمس هَلِّي

بددِّي بنورك ظلامي

وارمي همك فوق كتافي

جوّة حُضن القلب نامي

غَنّي طيرك فوق غصوني

رقص الفرح في كلامي

فاح عبير الورد مني

دقّ قلبي وزاد هيامي

والهيام فتّح ورودك

والربيع موسم غرامي

أغلى اسم فقلبي اسمك

واختفت كل الأسامي

ملاك الروح

ملاك الروح .. وحشتيني
ورحتي بعيد وسيبتيني
لكن روحي في أحضانك
ولا عمرك فارقتيني
ولما عيوني افتّحها
ألاقيكي ضياء عيني
حروف إسمك حفرتيها
على أيامي و سنيني
وغرس إيديكي في غيطني
سنابل قمح تكفيني
وغزلك ستر أيامي

يدفيني ويكسيني
زيارتك ليّا في منامي
مُنَى غالي يواسيني
لقانا تاني في الجنه
هيسعدني ويرضيني

مساء الفل

مساء الفل يا سمره
يا نجمة مزيّنة القمره
يا كاس يسكر بلا خمره
يا غنوايّه على نيلك
وانا شمعة في قنديلك
بيضحك لي سنا ضيِّك
الاقى الشوق بيحكيلك
تواسيني في أحزاني
أبوس أيدك وأدعيلك
ولو حسيت بحرمانى
بتكفينى مواويلك

يا أجمل أم في الدينا
تشاوريلى وانا اجيلك
أنا منك ... أنا همك
أنا صُبحك ... أنا ليك
أنا بكرة اللّٰي بيفتّح
وبيعطرّ مناديلك

راجع يادار

والله لارجع لك يا دار
واغزل سواد الليل نهار
وامسح دموع المجروحين
وابني في أطلالها العمار
واسقيكي يا صابرة عسل بدل المرار
واحضن قلوب العاشقين
وابدر هواهم في الديار
وامسك لجام المستحيل
واعمل لوجع القلب زار
والله لارجع لك يا دار

ما شيلش الهمّ

وأنا معاكي ما شيلش الهمّ
يا نسمة في ليالي الصيف
زمان كنتِ في أحلامي
ملاك بييجيني زيّ الطيف
ماهو أنتِ لدنيتي امبارح
وبكرة اللي نهاره لطيف

همس القلوب

شايـف قلبي مادد لك إيدـه
حاسس إنك عيدك عيدـه
ولقيت فجري عليك بينادي
تبقي فعمري سيدي وسيدـه

سايـب نفسي لدقات قلبي
زارع فيه اشواقي وحبـي
لحظة يغني يقرب مني
ومليون لحظة يداري يخبي

قلبي انا عايش ويا غناه

وسنين عمري بتستناه
خايف بس عليه من حبي
لما لقيت الروح عشقاه

ياللي الشمس دي نورها فى قلبك
نبح حنان دنيتي حباه
كنت بغالط نفسي وامانع
ولقيت نفسي بتتمناه

نغم حرفك بالألحان
وعلى الضحكة كمان وكمان
وارمي همومك ياللا بسرعه

وارجع طفل جميل فرحان

أحضن حلم جميل بينادي
يزرع فرحه وبسمه في وادي
جايّة شموع الحب تنور
والأشواق بتقوله يا هادي

ياللي حنان الكون في كلامك
حلو غرامك حلو سلامك
عاشق صوتك حتى ملامك
طفل صغير اكون قدامك
وادعي في سجودي وصلاتي
ربي كريم يسعد أيامك

وايه يعني !؟

وايه يعني أتوه تاني !؟

ماهو انتِ عنيكِ واخداني

وايه يعني أكون عاشقك !؟

وعاشقك فيّا وجداني

أكون ليكي ضيا ليلك

قمر نور قناديلك

أكون زهرة في بستانك

وبسمة في عزّ أحزانك

أنا قلبي فدا قلبك

حياتي ودنيتي عشانك

القلب يدوب

أنا جيت الدنيا عشانك
أشبع من شهد حنانك
واسقيكي الحب بإيدي
ما أنا ضلّك ويّا أمانك
أنا جيت أزرعك بسمّة
أمسح بيها أحزانك
واخطف من عينك دمة
تخضّر قوام أغصانك
أنا جاي مشتاق وماددك
أيدي طالب إحسانك
والقلب يدوب من الفرحة

لو حتى زارك فى منامك
والعين يكفيها رضاكي
والقلب عُناه فى كلامك
الله على إيدي فى ايدك
الله على حلو غرامك

شاورة عينية

ورجعت اتبسّمت

الدنيا من تاني

بعثتلي مليون فرح

مسحت لي أحزاني

شاورة عينية لسكتي

صَبَحَ البعيد داني

حبّه مَلَأَ مُهْجَتِي

صورتَه في وجداني

زي القمر في السما

ونجومه عشقاني

شعره بسمار الليل

والحسن ربّاني
صوته كما الأبحان
في القلب عجباني
دا هديّة من الرحمن
وأنا إيه أقول تاني!؟

كوني لي

كوني في الغربه جواب

وافتحى لي ألف باب

كوني لي كل الصباح

كوني همسي...

كوني ضحكه جوّه ياسي

كوني بكره .. كوني أمسي

نوريلي بالأمل ليل الطريق

وافرشيه ورد ومحبه

كوني ليّا كل شيء

كوني لما احكي حكايتي

كوني في الدنيا مرايتي

كوني لو شرقت غايتي
كوني لو غرّبت غايتي
يوم لقاك كان بدايتي
يوم فراقك فيه نهايتي
فيه يكون قلبي البريء
في بحور الشوق غريق
تكوي فيه نار الحريق
كوني ليا كل شيء

في ملكوتي

أنا هايم في ملكوتي
ما بين عيشتي وبين موتي
وجوع بطني بقى قوتي
وعزّ صراخي فسكوتي
وخوف صمتي صبح صوتي

تبكّيني دموع مظلوم
واتبسّم وأنا مكلوم
واستعففّ وأنا محروم
ومهما يطول ظلام ليلى
أكيد راحل ومش هايدوم

إحكي شكوتك

ياللي انت ميّت

من زمان

ليه العصايا تخوّفك

ياللي أنت عايش

في الظلام

مجهول

ما مخلوق يعرفك

عمر الرصاص ما يموتك

أوعى تخلي الظلم

تاني يسكتك

جلجل في كل الدنيا ...

واحكي شكوتك

أنده وقول الحق

أخرج وقول للظلم "الأ"

أصرخ ورجع ثورتك

أنت الأحقّ ...

أنت الأحقّ

هتّ لياليكي

هتّ ليالي الربيع

هتّ لياليكي

مهما تمرّ السنين

دايب أنا فيكي

ومهما أتوه في الوجوه

سحراني بعنيكي

ولو تزيد الهموم

برضايا أرضيكي

أبعد ساعات عن لقاكي

وخيالي يناديكي

ولو بعيد عن عيوني
طيفي حوالكي
وإن ضاق عليّ الحال
حبي يكفّيكي
قلبي يقف م الخوف
لو نسمة تؤذيكي
روح واحدة في جسدين
فيّا أنا وفيكي

شَجَن مَكْبُوت

بين الحياة والموت
بيعلَى للسمَا صوت السكوت
والفجر ودّع بكره
وطواه التابوت
تخرج براكين الألم
شَجَن مكبوت
والذكريات الحلوه والمرّه
قصادي تفوت
وشموسي يقتلها الخفوت
وحبّه .. حبّه تختفي كل الوجوه

وأبدأ أتوه
في وشوش جديده
وخلق تاني مشفتهاش
قبل النهارده
وطيور ترفرف في المكان
لجناحها فارده
والضلمة تزحف ع العيون
ويسبّلوا ليّا الجفون
آنت خلاص ساعة الرّحيل
وكتابي في أيديّا دليل
وكتابي في أيديّا دليل

أذكريني

خرجي الليل
اللي حايش نور عينيكي
واطلقي الفجر
اللي محبوس بين إيديكي
عومي أمك في قلبك
دوري على قلب حبك
وانسي قلب في يوم غدر بك
أخنقي الحزن اللي خنقك
أخنقيه
بصي ده طريقك منور
بالورود راح تفرشيه
واوعي تفتكري شعوري ده كلام

ده شعور خلاه شجونك
صاحي مش عايز ينام
بددي الآهه بهمسة ضحكتك
نوري بالضحكة قناديل سكتك
واعرفي كل القلوب فيها آهات
بددي الآهه بهمس الذكريات
وانكريني يوم مضي
مافيهوش آهات

أم الدنيا

مصر بلدنا يا أم الدنيا
دولة عظيمة وشعب عظيم
عُمر ترابها ما ها يهون ثانيه
وأنا براكي يا أمي يتيم
عُمر فداكي وعُمر ولادي
ارض جدودي وغنى احفادي
ياللي ترابك كحل العين
ياللى سماكى دعا الوالدين
عاشق شمسك عاشق نيلك
عاشق لو غنيت مواويلك
وقت العتمة ... اكون قنديلك
دا أنا بإشاره أجري وأجيلك
دا إنتي حبيبته قلبي الغاليه
ما اديش قلبي يا سمره لغيرك

عيد ميلاد

كل سنه وإنتِ هنا
منوره قلبي أنا
وإنتِ عليًا حنينه
ويدوم علينا حبنا
أنتِ الأمل أنتِ المنى
وإنتِ الرجا من ربنا
وبكرة جاى يضجكلنا
وزهور ربيعہ تضمنا
يا عمري يا كل الحياه...
جوه الفؤاد متسلطنه.
من أد إيه !! يا عمري أنا
وعدى علينا كام سنه
أوعي تقولي.. و نتعرف
لنتحسد على عشنا

عيونك حبيبتى

ف عينيكي أجمل منى
وشدو صوتك غنى
ف الدنيا إنتي وأنا
عايشين ف جنه وهنا
يا ضي ضي القمر
دابت عيوني سهر
إمتى ينادي القدر
وأيامنا تضحك لنا

يا روح تناجي الروح
يا ملاك يداوي جروح
يا عطر زهر يفوح
بستانه بيضمنا

فَتَّحِ الْيَاسْمِينَ

صباحك فَتَّحِ الْيَاسْمِينَ

على بابي

ما هو إنتِ كل ما ليّا

وإنتِ كل أصحابي

وقلبي لو في يوم يعشق

هاتبقى كل احبابي

ما هو إنتِ للحياه بسمه

وإنتِ في صيفي أنا نسمه

وقمره في السما راسمه

ورود ألوانها عتّابي

ونجمه ضيّها مرسوم

في نن العين

وعصفور في سما الجنه
يعني مرفرف الجناحين
طريق أخضر سنابله قمح
وليل سهران لحد الصبح
ويستى النهار يطلع
يفتح صبحك الياسمين

فيكي إيه !؟

فيكي إيه خلّاني أحبك
فيكي حنيّه وحنين
قلبي مش واخذ عليه
فيكي حزن وشوق واخذني
فاض حنين القلب بيه
هاتي أيديك ويّا أيدي
تنده الأشواق تيجيه
أرسمي أسمي ف وريديك
ياللي صورتك بتناديه
واطلبي روعي أزيدك
والقمر فاتح أيديه
شمس نورها مالي قلبي

عاشقه ليلي وبتاجيه
عيني ويا الروح عبيدك
واللقا فرحانه بيه

تحضيني !!

لسه فاتحه لي دراعاتك

لسه عايزه تحضيني

لسه رغم البُعد عنك

ماليه احساسى وحنيني

مهما تبعدني الأماكن والسنين

غصب عني .. يكبر الشوق والحنين

يفرح الدمع اللي محبوس جوّة عيني

والقاكِ إنتِ بتناديني وتحضيني

ليه رضيت القسوه منك

رغم إني حتة منك

وافتكرت بعادي عنك

فتره راح يشفيني منك

فجأه لما عينيكي شاورت
شفت صورتتي جوّه نّك
والدموع جرّيت في عيني
وكل صورة جارحه قلبي
مات ألمها ويا ظنك

ضحكه تايهه

بادور على ضحكتي التايهه
وبسمة لبحره قتلوها
وشمسي الطالعہ دفنوها
وأحلامي اللي قدامي سرقوها
أنا مصري
وطول عمري وأنا شقيان
يشاوروا عليا ويقولوا:
" راجل غلبان "
وأنا صابر وباتمنى
رضا الرحمن
وصبري كبير
لكن عمري ما كنت جبان
ولما ينتهي صبري

أكون هادر كما الطوفان
وطوفاني يغرق ظلم ايامي
وأوهامي واعيش إنسان

إزاي أعيش!؟



همس الحروف أصبح سكات
والفرح جوه القلب مات
والعمر بعد ما كان أمل ...
بقي ذكريات
حتى البراق...
اللي صنعتيه بضحكتك
سابني وفات
لما نويت ع الرحيل ما قولتليش
لا والله قولت
بس أنا ما صدقتكيش
اهون عليكي ياسمر
ف الدنيا من غيرك اعيش
قدام عيونى تبقي شمس منوره
وفي لحظة تانيه مالقاكيش
من غيرك إنتِ قوليلي

يا همس المحبه
أزاي أعيش !?
أزاي أعيش !?

صباحك خير

صباحك خير أمل طاير
بيرسم فوق خطاونا
ربيع فرحان
يهني الضحكه فى قلوبنا
ويسعدنا يدوبنا
بنبقى معاه فى الجنه
يحنّي أيدينا بالحنه
نعيش وياه ونتهنى
ونحضن بيه أمانينا
نلاقيها تواسينا
من الأحزان تداوينا
تبان الفرحة فى عنينا
ونسجد للاله داعيين يفرحنا يهيننا

إرضى بأسباب الوجد !!

إحبس همومك في التابوت
وارضى بأسباب الوجع
مش راح يحس حد بيك
هاتشيلك الدنيا وتقع

بتخبي ليه دموع الشجن
ماهى بكره ع الخدين تسيل
زاد الوجع .. مات الألم
واللي عدلته راح يميل

الناس كتير حوالياً لكن ليه وحيد
كل ما بيقرّب شقايا لآخرته ألقاه بعيد
والعمر كل مايلقى سكنه وسكته
يرجع شريد

مكتوب على باب دنيتي
اصبح طريد
للمر والويل والعذاب
لو حتى عشت الف عمر
من جديد

إزرع فرح

ما تشيلش يوم الهم

مهما هاتكبر شكوتك
مسيرها يوم تتلم
واسجد لربك واحمده
كفاية عندك أم
أكبر نعم ربنا
في الدنيا لينا الأم
عطف وحنان قلبها
يشفي القلوب ويضم
البشر في وشها
يمحي خيوط الغم
والمر من أيدها شهد
حتى ولو كان سمّ
حنانها من ربنا
الكل عارفينه
دعاها شق السما

بورده وبساتينه

الجنه تحت القدم

ومكان قدمها الراس

مخلوقه مش م البشر

مخلوقه من الإحساس

كل الهامات تنحني

دي أمي حبيبي ياناس

أمي في عمري أنا

مش بس ست الكل

دعوة رضا لربنا

الخير معاها يهل

واخداني للجنة

من غير تعب ولا كل

الأم دي مدرسة
ودروسها مجاني
تدخل دروس فصلها
ما توهش من ثاني
البسمة من وشها
تكتب لي عنواني
يارب مين زيها
دعوتها نفعاني

وعاشقاني مراسيكي

أصحي الشوق واصحيكي

بروحي وقلبي أناديكي
ولو بصيتي بعيونك
تلاقي طيفي حواليك
يا ساكنة في عيون قلبي
وضي العين فدا ليكي
تتاجيني .. وانا جيكي
يا قمره في ليالي العشق
بتندھلي وانا جيكي
ونجمة حلوة سهرانه
ولو تاهت تتوه فيكي

أشوف صورتك في أحلامي
ألاقي الفرحة قدامي
واشوف الشمس تتبسم
أدوس على كل أوهامي

أصالحه وهو يصالحني
بهمس الشوق يفرحني
ما عمره في يوم يجرحني
ولو زادت هموم قلبي
دفا حزنه يريحني

وبين الرمش والتني
أتوه في غرامه أكمني
والأقي عينيه بتحضني
ساكن قلبه وساكني
ولما الدنيا تجرحني
الأقي عينيه تظمني

يعدي العمر علشانه

واسافر جوّه وجدانه
يا نبتة حب عشقاني
وحلم الروح فى احضانه

صباح النصر

صباح النصر يا بلادي
صباح فرحان .. صباح نادي

صباح فرّح أهالينا
وشايل نصر مش عادي
كأن الفرّح كان مشتاق يفرحنا
كفايا دموع بقي ياللا
ندوس على همّ جرّحنا
ونلحق بكره يفرحنا

تعالوا بقلبنا نرسم
طريق مفروش بأمانينا
يفرح عمرنا الحيران
ما بين يأسه وخطاويننا
تعالوا نحضن الأيام
نلاقيها تواسينا
تبوس فرحتها على روسنا
ويفرح عمرنا بيننا

ويفرح عمرنا بينا

اسعديني

واكتبي إسمي وإسمك

تاج منور فوق جبيني

ارسميني بسمه صافيه
فوق شفایفك إرسميني
ياللي صورتك فرحة تمسح ...
همّ عمري ودمع عيني
ياللي قلبي اختارك إنتِ
كل أشواقي وحنيني
عمري كله ملك إيدك
كل أيامي وسنيني

إرمي الهموم

خلي الكرامة نور للعين
ما يكونش ليك أبداً وشين

ولا تمشي طرطور وسط الناس

ولا تبقى عارف رايع فين

ما تشتكيش أبداً من الناس

وتقولي ماشيه عكس عكاس

خلي الهموم في الأرض مداس

تلقى الأصول والدين حرّاس

خلي العيون باصه لقدام

وما تشتكيش وتقول دا حرام

ولا تفتريش ع الخلق كلام

لو تصفى ليك يوم الأيام

أرمي الهموم ياللا معايا

وليه تبيع الضحكايه

خللى الأمل فرصه وغايه
تلقى الرضا فقلبك غنى
وتكون لكل الناس إيه

ما تقولش آخري خلاص موجود
وتعيش تقول للناس موعود
دا كل شيء في الكون له حدود
يمكن تكون من الناس محسود
وأكيد هتلقى الفرح يعود

وابكى البكا ساعات بيريح
يغسل قلوبنا من الأحزان
نبقى في أفراحنا ندمع
ونقول يارب عيدها كمان

حدوتة متكرره وأكيد هترضينا
لأنقول بقى رزقنا مش راح يكفيننا
ولا يوم نلوم حظنا ونبيع أمانينا

واغزل نهارك بالأحلام
أوعى في عز الفرحة تنام
طول ما انت بنصيبك راضي
كل الأمور راح تبقى تمام

كل حاجة فيكى حلوه

كل حاجة فيكى حلوه

كل حاجه مطمئاني
حتى دقات قلبي غنوه
كاتبه فيها اجمل معاني
بعد ما لقيت عمرى ضايع
السنين ويّا الثواني
فجأه رجعت لابتسامه
كل شىء حتى الأمانى
كل حلم منى ضايع
التقيته فى حضنى تانى
إوعى تانى يا حزن ترجع
توه وخذ وياك زمانى
بدل الناي بالكمنجه
بدل النوح بالأغانى
إوعى تانى تغيب يابكره
أو تتوه يوم عن مكانى
أو تسيبنى لدمع قاسى

أو تسبيب الروح تعاني

محتوى الكتاب

2	بطاقة الكتاب
3	كلمة شكر وعرّفان
4	الإهداء
5	حلو الشمايل
6	أنا المصرى
8	ألم تانى
9	ألم واحد
11	أنا منها
13	عاشق ترابك
15	طفل شهيد
17	صباحك ورد
19	حياة سليمان
21	الصبر خداع
24	زلزلينى
26	قلب متعشم
28	طلّة قمر
30	قول يا قلم
32	آه يا وطن
34	حروف الشقا
36	كريم يارب
39	همس الحروف
41	أغلى إسم

42	ملاك الروح
44	مساء الفل
46	راجع يادار
47	ماشيلش الهم
48	همس القلوب
51	وايه يعنى
52	القلب بيدوب
54	شاورت عينيه
56	كونى لى
59	احكى شكوتك
61	هلت ليايلىكى
65	أذكرينى
67	أم الدنيا
68	عيد ميلاد
69	عيونك حبيبتى
70	فتح الياسمين
72	فيكى إيه
74	تحضنينى
76	ضحكة تايهة
78	إزاي أعيش
80	صباحك خير
81	ارضى بأسباب الوجع
83	إزرع فرح
86	وعاشقانى مراسيكي

89 صباح النصر
91 اسعدينى
92 ارمى الهموم
95 كل حاجه فيكى حلوه
97 محتوى الكتاب